

uno castello di questa Majestà, si chiama Chines, lontan da Cales 12 mia, credando meter l'asedio e aver duto castello, e le zente di questo serenissimo Re ussi fuora e li ha fato tornar in Franza, e assai ge ne amazò. Questo serenissimo Re zà do mexi comenzò a far passar zente et ogni zorno passa, et si dice presto passerà Sua Majestà; e, come el scrisse, si dicea dovea passar de Mazo e far noze. La cauxa non à exeguido, per mior respeto no'l scrive; ma se dice questo Re averà 80 milia persone: Dio ge conzieda bona vittoria! Sono beli homeni, ben in ordine e vanno con gran corazo.

A dì 19 dil passato zonse de qui l'ambassador dil Papa con la spada e il capello, el qual è fiorentin, prothonotario, da cha' . . . ; ge andò incontro alcuni signori benissimo in ordine, con zercha 400 cavali. Era piene le strade di persone che steva per veder ditto ambador con la spada e capello, la qual spada havea uno servitor davanti l'ambador con la punta in suso, et el capelo in zima la spada, la qual è grande, con i elzi doradi, la vazina indorada, con uno cento indorado. El capello par esser de raxo paonazo, fato al modo de la capelina d'un capelo stradioto, longo un pe', non spande in fuora, ma cussi tondo, tutto lavorado de sopra con rechami e perle, con certe cordelle che pichava zoso. La majestà dil Re si era in Londra in el palazzo dil vescovo, el qual è apresso la chixia di San Paulo, ch'è la chiesa principal di la terra; e fra ditto palazzo e la chiesa è uno campielo de mezo. La Domenega, fo 21 Mazo, fo fato una bella procession, et essendo stà invidato il magnifico ambador nostro, ge n'andò volentieri per aver abuto avanti letere di la Signoria drizate a questo serenissimo Re. Il dito ambador andò al palazzo dove era il Re e tutti li signori si trovava in la terra in ordine, con veste sfozade e devisade a suo modo; e zonto ch' el fu de suso li veniva incontra quelli signori, tochandoli la man, dicendo: « Ambador, siati el ben venuto, » e parlando domesticamente con cadaun de quelli signori, come se fusse nato de qui. Venuto la majestà dil Re fuora per andar a la procession, l'ambador se li fe' davanti, et fato la debita reverentia, volse apresentar la letera. Sua Majestà disse: « Padre, andemo a la santa procession e messa, e fornida che la sarà, andaremo a disnar e da poi saremo insieme; » e cussi feze. El palazzo preditto, dove era il Re, è come el campaniel di San Marco, e la chiesa di San Polo come saria quella de San Marco, et per più honor, ovvero per schivar le persone per el morbo, Sua Majestà montò a cavallo sopra una bellissima chinea negra quanto

veludo negro, e tutti li signori a do a do davanti Sua Majestà. L'ambador nostro fo fato restar de li ultimi apresso il Re, per esser più honor, a brazo con el capitano zeneral de l'armada, qual è fiol de monsignor Thexier, el qual in questi zorni pasadi el Re ha fato ducha. E arivati a la porta di San Polo, Sua Majestà dismontò e andò in chiesa a l'altar grande, dove era l'orator dil Papa con la spada e il capello; qual vene avanti il Re, e prima mostrò il brieve di credenza, poi leto, li feze una oration brieve in laude di Soa Maiestà; e, finida, il Re feze segno a un prete dotor li rispondesse; qual li rispose benissimo a la improvisa in ringratiar il Sommo Pontefice. Da poi, a l'altar grande il Re se inzenochioe, e da do signori e dal nostro ambador fo cento la spada a Sua Majestà, et messo il capello in testa, qual, per esser longo, ge coverziva tutta la faza, e fo fatto per demonstration, non che lui portasse spada, nè el capello. Poi comenzò la procession dentro via de la chixia intorno intorno. Era una bella cossa a veder la majestà dil Re e quelli signori, quali sono belli homeni e benissimo in hordine di veste di seda di più sorte, fodrade di martori, de lovi zirvieri, e de zineti, che 199 qui costa una tal fodra assai danari, et alcuni con altre veste pur di seda de do colori fate a schachi, et alcuni con altre fantasie de veste sfozade a suo modo, et tutti con le sue colaine d'oro, che in vero era tal signor che havea sì grossa, che chi la metesse a li pie' di un ladro, in locho de un per de ferri, saria bastante a costudirlo, tanto erano grosse; val assaissimi danari. - Il Re avea una vesta di raxo paonazo e d'oro fata a schachi con certi fiori d'oro, con manege et bavaro, e havea uno colaro con zoje che val un pozo d'oro; de veludo paonazo la bareta con do foze con zoje suso; el zupon de restagno d'oro. Da poi la procession, comenzò la messa granda molto solenne con canti e soni; compida la messa, era una hora da poi mezo dì, si partì il Re da la chixia con tutti li signori e l'orator nostro, e ritornò nel palazzo a do a do secondo prima. Era pien per tutto di homeni e done che stava per veder il Re, la spada e capello; fo giudicato esser persone 30 milia. E zonto il Re a palazzo, fo ordinado di novo che l'ambador nostro restasse a disnar con Sua Majestà, e cussi restò e fo ben visto, sicome nel passato sempre è stato. Era l'ambador di Spagna anche lui fo invidato a disnar, et lui aldi che uno di primi gran signori li disse: « Ambador, disnè qua con nui per compagnia; » e lui recusò, non volse; e altri signori li disse: « Ambador l'ora xe tarda, disnè con nui, » *tandem* non volse, vergognandose de la paxe à fato